



Réponse de Monsieur le ministre de l'Économie, des PME, de l'Énergie et du Tourisme, Lex Delles, à la question parlementaire n°2865 du 15 septembre 2025 de Monsieur le député Sven Clement au sujet des restrictions territoriales de l'offre

- 1. Wéi schätzt den Här Minister den Impakt vun territoriale Liwwerbeschränkungen op d'Präisser zu Lëtzebuerg an, a wéi eng Produktkategorien sinn am meeschte betraff ?*
- 2. Huet d'Regierung oder de STATEC eng Analys duerchgefouert, déi de finanziellen Impakt vun dëse Praktiken op d'Lëtzebuerger Haushalter quantifizéiert ?*
- 3. Wéi eng konkret Moosnamen huet d'Regierung bis elo geholl oder plangt se ze huelen, fir géint dës territorial Liwwerbeschränkungen virzegoen ?*
- 4. Gëtt et eng Zesummenaarbecht mat aneren EU-Memberstaaten, besonnesch mat Éisträich, fir gemeinsam géint dës Praktike virzegoen ?*
- 5. Wéi eng Roll gesäit d'Regierung fir d'EU-Kommissioun an dësem Kontext, a wäert Lëtzebuerg sech op europäeschem Niveau fir eng méi streng Regulatioun vun dëse Praktiken asetzen?*

Déi territorial Liwwerbeschränkungen, och nach „restrictions territoriales de l'offre” (RTO) genannt, si Restriktiounen, déi den Entreprises d'Fräiheet huelen, Produkter am Land vun hirer Wiel ze beschafen. Dëst kann d'Verfäim vum de verfügbare Produkter reduzéieren an zu méi héije Präisser fir d'Konsumenten ze féieren. E Beispill heivun ass, wann e Lëtzebuerger Betrib vun engem groussen Hiersteller gezwonge gëtt, seng Wuer aus dem Land A ze beschafen, amplaz kënne vu potenziell méi gënschtege Konditiounen am Land B oder C ze profitéieren. Déi territorial Restriktiounen sinn e ganz konkret Beispill fir Hindernisser am EU-Bannemaart.

D'RTO sinn zanter laangem e Probleem fir d'Lëtzebuerger Entreprises a Konsumenten. Gläichzäiteg kann dës Problematik net op reng nationalem Niveau gereegelt ginn, well se sech ausschliisslech op grenziwwerschreidend Situatiounen bezitt. Eng europäesch Léisung ass also néideg, déi aktuell Moyene vum Konkurrenzrecht ginn net duer, fir territorial Aschränkungen efficace ze bekämpfen.

D'Regierung engagéiert sech zanter ville Joren op EU-Niveau, fir op dës Thematik hinczewiesen a fir datt déi Europäesch Kommissioun en EU-wäit Verbuert vun territorialen Aschränkungen aféiert. Zanter Ronn zéng Joer gëtt et eng intensiv Zesummenaarbecht tëschent den dräi Benelux-Länner - Lëtzebuerg, Belsch an Holland - fir de Sujet op EU-Niveau op den Agenda ze setzen.

Am Kader vun der Benelux-Zesummenaarbecht an och op nationalem Niveau sinn Etude gemaach ginn, déi weisen datt territorial Aschränkungen zu méi deiere Grossisten- a Verbraucherpräisser féieren. D'Resultater vun enger Enquête am Benelux gouf 2018 an engem Rapport publizéiert:

<https://www.benelux.int/fr/publication/les-restrictions-territoriales-de-loffre-dans-le-commerce-de-detail-en-belgique-pays-bas-et-luxembourg/>.

Den Asaz vun der Regierung, zesumme mat hire Benelux-Partner, huet dozou gefouert datt d'EU-Kommissioun sech zanter 2020 méi intensiv mam Thema vun den RTO beschäftegt. 2020 huet eng Etude vun der EU-Kommissioun gewisen, datt territorial Aschränkungen en EU-wäit Phänomen sinn, an net just kleng Memberstaaten an d'Beneluxlänner betreffen. Dës Etude huet och geschat, datt d'RTO op europäeschem Niveau zousätzlech Käschte vun ongeféier 14 Milliarden Euro pro Joer verursaachen, déi haaptsächlech vun de Konsumente gedroe ginn.

Am Mee 2024 huet Lëtzebuerg, zesumme mat Holland, der Belsch, Griichenland, Kroatien, Dänemark, der Slowakei an der Tschechescher Republik, d'EU-Kommissioun opgefuerdert, op Grond vun den etabléierte Fakten, e Verbuet vun territorialen Aschränkungen anzeféieren. Doropshin huet d'Kommissioun e Groupe de Travail am Kader vun hirer „Single Market Enforcement Taskforce“ geschaf, fir e besseren Iwwerbléck vun der Situatioun an de 27 EU-Memberstaaten ze kréien.

D'EU-Kommissioun huet dunn am Mee 2025 déi territorial Aschränkungen an d'Lëscht opgeholl vun den 10 restriktivste Barrièren am Bannemaart, déi et gëllt ofzeschaffen, dëst am Kader vun hirer neier Bannemaartstrategie. D'Kommissioun huet och ugekënnegt, am Laf vum nächste Joer konkret Propositionen ze maachen, fir de Probleem vun den territorialen Aschränkungen op EU-Niveau ze léisen.

D'Regierung setzt sech mat hire Partner dofir an, datt d'Kommissioun eng legislativ Proposition mécht, déi zu engem allgemenge Verbuet vun den RTO-Praktike féiert. De 25. September 2025 huet de Wirtschaftsminister, zesumme mat sengen Homologen aus Holland an der Belsch e Bréif un den exekutive Vize-President vun der EU-Kommissioun, Stéphane Séjourné, geschéckt, fir datt d'Iddien aus der Bannemaartstrategie och legislativ ëmgesat ginn.

Um Conseil Compétitivité vum 29. September 2025, huet d'Regierung zesumme mat der Belsch an Holland eng Initiative vun Éisträich ënnerstëtzt, déi an déi nämmelecht Richtung geet, an déi vu Kroatien, Tschechien, Griichenland a Slowenie matgedroe gouf. Dës enk Zesummenaarbecht mat de Partner op EU-Niveau wäert an de nächste Méint weidergefouert ginn.

Luxembourg, le 02/10/2025

Le Ministre de l'Économie, des
PME, de l'Énergie et du Tourisme

(s.) Lex Delles